

南

漢

書

南漢書卷六

順德梁廷枏章冉撰

本紀第六

後主紀二

大寶十四年春正月宋將潘美等陷英州復陷  
雄州都統潘崇徹以眾降於宋宋師進次瀧頭  
帝遣使請和求緩師美等不許恐我兵設伏挾  
使者速度諸險甲子宋師至柵口乙丑至馬廐

屯雙女山下直瞰我軍柵遊騎數出挑戰植廷  
曉將發卒迎擊招討使郭崇岳止之堅壁自守  
帝取巨舶十餘艘載其妃嬪金寶將浮海未發  
宦官樂範與衛兵千餘盜舶走帝益懼遣王珪  
詣宋軍通好又遣左僕射蕭灌中書舍人卓惟  
休奉表詣宋軍乞降宋殿直冉彥袞以灌等赴  
汴帝命崇岳戒嚴二月丁卯朔命判六軍十二  
衛正王保興率百官出迎爲崇岳所遏己巳遣

保興率國內兵併力拒戰庚午植廷曉領前鋒  
據水陣崇岳殿後宋師濟廷曉戰敗死之崇岳  
奔還柵美募丁夫間道造柵縱火天風轉北我  
軍復大敗崇岳爲亂兵所殺保興逃歸龔澄樞  
李托與內侍中薛崇譽等焚府庫宮殿帝欲赴  
火死不決辛未宋師至白田帝素衣白馬出城  
北七里降漢亡美等入城俘宗室官屬九十七  
人與後主同縶於龍德宮斬宦官五百餘人州

六十縣二百十四戶十七萬二百六十三盡籍  
於宋四月美遣使部送後主及宗黨官屬歸宋  
京行抵公安邸吏龐師進迎謁後主問學士黃  
德昭師進何人何爲在此德昭曰高祖居藩時  
歲貢大朝輜重皆厯荊州令師進置邸於此造  
車給餽運耳後主泣嘆曰我在位十四年未聞  
此言今始知祖宗山河乃大朝境土也因泣下  
至宋京師舍後主於玉津園甲午宋太祖命參

知政事呂餘慶劾問約降復戰及焚府庫之罪  
後主歸罪龔澄樞李托薛崇譽太祖復遣使責  
問澄樞等皆不能對五月乙未朔宋有司率武  
士以帛繫後主及官屬先獻太廟及太社太祖  
御明德門樓通事舍人引後主就東西街南北  
向俘位太祖遣攝刑部尙書盧多遜宣詔責後  
主後主曰臣年十六僭偽號澄樞等皆先臣舊  
人每事臣不得自由臣是臣下澄樞等是國主

遂伏地待罪太祖命攝大理卿高繼申斬澄樞  
托崇譽三人於千秋門外釋後主賜宴於大明  
殿賜襲衣冠帶器幣鞍馬授金紫光祿大夫檢  
校太保右千牛衛大將軍員外置同正員封恩  
赦侯班在上將軍下以正王保興爲右監門率  
府率右僕射蕭濯爲太子中允中書舍人卓惟  
休爲太僕寺丞餘並署諸州上佐縣令主簿賞  
賜有差六月乙酉宋太祖賜後主月奉外錢五

萬米五千斛開寶五年五月庚申賜錢百五十萬八年十二月己未江南平遷後主左監門衛上將軍進封彭城郡公太平興國初進衛國公二年二月壬子賜宴崇德殿三年正月辛丑賜宴崇德殿三月己酉賜宴長春殿六年三月薨年三十九太宗廢朝三日贈太師追封南越王後主性庸懦早歲嗣位政務未諳疑羣臣皆有家室惟宦者專誠可信遂委國事於龔澄樞陳



延壽及才人盧瓊仙臺省官僅備員不復預機  
密每詳覽可否皆瓊仙指之延壽又引女巫樊  
胡子入宮自言玉皇附其身呼後主爲太子皇  
帝詭言瓊仙澄樞延壽皆我遣輔太子有過不  
得治於宮中施帷幄列珍玩設玉皇座樊胡子  
冠遠遊冠紫衣紫霞裙坐爲玉皇言宣禍福事  
皆決焉後主再拜聽命梁山師馬媪何擬之徒  
出入宮掖宮人多具冠帶領外事先是高祖雖

寵任中官然數裁三百餘位不過掖庭諸局令  
丞中宗稍增至千餘人已有內常侍諸謁者之  
稱至後主漸至七千餘有爲內三師三公者諸  
使名多至二百女官亦有師傅令僕之號以百  
官爲門外人臣工有小過及進士狀頭或釋道  
稍負才畧可備問者皆下蠶室令得出入宮闈  
由是綱紀大壞又踵祖父奢酷立萬政殿一柱  
之餘費白金三千錠以銀爲殿衣間以雲母無

名之費日千萬興王府中鑿湖五百餘丈曰藥  
洲聚方士煉藥縱罪人使移太湖靈壁及三江  
所產巨石凡九浮海歸置洲中以自贖城西濬  
玉液池以歲之五月五日出宮人競渡其中又  
崇信釋氏敎於府城四面建二十八寺以應列  
宿嘗夢神人指羅浮山之西去延祥寺西北兩  
岸疊中一洞可爲宮遣人訪得金沙洞地建天  
華宮又夢金龍起於宮所改洞曰黃龍時議於

增城江口穿渠達羅浮便巡幸因宋師來不果  
於海鎮募兵能采珠者二千人號媚川都每以  
石繩索繫兵足入海五七百尺多溺死久之珠  
充積內府焚蕪之後尙餘美珠四十六甕所居  
殿宇梁棟簾箔率以珠雜玳瑁爲飾窮極華麗  
宮中有魚英託鏤椰子立壺四各受三斗作離  
宮數十挈波斯女不時遊幸常至月餘或旬日  
每歲荔支熟於昌華苑設紅雲宴又命宮人三

月關花內殿後主向晨先啟苑集眾採擇俄敕  
扃戶膳訖於內殿角勝負內官抱關置樓置厯  
以驗宮人出入曰花禁負者獻要金要銀買燕  
自稱蕭閒大夫是時國用日蹙重民賦斂定媚  
川都課邕民入城者人輸一錢邕州米斗稅四  
五錢制大量每石凡輸一石入斗巡遊所在率  
以豪民爲課戶供宴犒之費城內行乾亨鉛錢  
城外行乾亨銅錢禁其出入犯者抵死俸祿非

出特恩不給銅錢大海中生金銀蜆味殊珍異  
後主取以自奉私採者禁作燒煮剝剔刀山劒  
樹之刑或令罪人鬪虎抵象以爲笑樂怨聲載  
道末年野蕈生於宮殿狐鳴鬼哭妖怪日作災  
異疊見以迄於亡初高祖建國召司天監周傑  
筮之過復之豐數當五十五年傑假五百五十  
爲對始作宮室得石讖文曰人人有一山山值  
牛兔絲吞骨蓋海承劉解者謂人人有一大人

也山山出也值牛者丑歲建國兎絲者中宗卯  
歲襲位也吞骨殺諸弟也天水爲趙蓋海宋國  
姓承劉受劉氏降也大有改元欽州民握羅浮  
山得古劒獻之篆文曰丁與水同宮王將耳口  
同尹來居口上山岫護重重解者謂宋太祖以  
丁亥誕下三語於文爲聖君出也乾和中童謡  
云羊頭二四白天雨至解者謂辛未二月四日  
宋師逼城之兆大寶中多火災令民家置防火

大桶識者謂防房桶統同音宋分野屬房言一  
統也至是國滅蓋有先兆焉後主雖以愚敗國  
然素有口辯能詠諧巧作奇技入宋後嘗以珍  
珠結鞍勒爲戲龍狀名珠龍九五鞍獻太祖詔  
示尙方諸工官皆駭異給錢百五十萬償其值  
謂左右曰張好工巧遂習以成性倘能移於治  
國豈至滅亡哉在國時每置醢斃其臣下一日  
宋諸臣從太祖幸講武池後主先至賜以卮酒



疑有毒捧杯泣辭曰臣承祖父基業拒違朝廷  
勞王師致討罪固當死陛下不殺臣今見太平  
爲大梁布衣足矣願延旦夕之命以全陛下成  
恩臣未敢飲此酒太祖笑曰朕推赤心置人腹  
安有此事取其酒自飲別酌賜之後主大慚謝  
太宗將討太原宴近臣後主預焉奏言朝廷威  
靈及遠四方僭竊之主今日盡在座中且夕平  
太原劉繼元又至臣率先來朝願得執挺爲諸

降王長太宗大笑賚子甚厚旣薨賜歸葬於韶  
州城北六里之王山

南漢書卷六終

南漢書考異卷六

順德梁廷枏章冉撰

後主紀二

十三年九月己亥朔宋潘美等發十州兵攻賀

州

至

十四年二月辛未帝素衣白馬降

按用兵月日諸書互有異同宋史太祖紀

九月己亥朔命美等會賀州十月庚辰克

賀州十一月壬寅下昭桂二州十二月壬

申下連州辛卯下韶州四年正月癸丑取  
英州雄州二月己丑克廣州紀內日月當  
各就聞捷日書之修宋史時止據宋國史  
或實錄不復更正則本紀月日不足據也  
銀傳無出師月日餘則有月無日八月師  
至白霞九月圍賀州城陷十月陷昭州桂  
州十一月陷連州十二月陷韶州四年正  
月陷英州雄州次瀧頭二月過馬逕入廣

州而美傳云十月下昭桂連三州與銀傳  
異東都事畧九月壬子克富州十月克賀  
州十一月克昭桂二州十二月庚午克連  
州戊子克韶州正月克英雄二州二月丁  
亥克廣州稽古錄九月乙卯拔富州十月  
庚寅拔賀州十一月壬寅拔昭桂二州十  
二月辛亥拔連州均與宋史異玉海十二  
月壬寅下桂昭連三州遂下韶州又註云

十二月辛亥拔連州二月庚午入廣州亦  
與宋史異今惟命將月日從宋史紀餘悉  
從續通鑑然續通鑑與諸書亦互有詳畧  
宋史紀云九月美等敗南漢萬衆於富州  
下之美傳亦云九月進克富州事畧亦云  
壬子潘美克富州而續通鑑無之又鋹傳  
遣其弟保興率百官奉迎美傳遣王珪詣  
軍門求通好續通鑑亦無之又玉海引露

布二月四日己巳遣其弟保興併力決戰  
續通鑑乃繫於是月丁卯朔又賀州之克  
諸書皆云攻陷而續通鑑獨云開門以納  
王師此續通鑑與諸書異也又宋師渡馬  
逕歐史及宋史其傳皆在二月惟續通鑑  
在正月乙丑先一日甲子至柵口今按露  
布云於正月二十七日甲子到柵口去廣  
只一程與續通鑑合露布當時軍中所作



其月日斷不差誤則續通鑑視諸書較信  
矣又歐史遣其弟祥王保興率文武詣美  
軍降不納宋史張傳保興率百官奉迎爲  
郭崇岳所遏則歐史與宋史互有同異事  
畧先遣保興拒戰復遣保興乞降不納十  
國春秋亦兩事並存而奉迎事則依宋史  
且兩事先後不同則春秋與事畧各異又  
宋史張傳二月過馬廵去廣城十里張遣

蕭灌等奉表乞降師遂頓城外據此是去  
城十里乃乞降也而美傳乃云遣灌等乞  
降復遣保興拒戰美卽率士卒倍道趨柵  
頭距廣百二十里振兵十五萬依山谷堅  
壘以待據此是乞降後尙去城百二十里  
也則宋史兩傳互異又按振傳引童謡羊  
頭二四白天雨至語謂應二月四日天水  
姓擒振之義

按宋史云羊頭二四白天雨至天雨者王師如時雨之義

青箱雜記云羊二四日天雨至天  
雨猶天水斤國姓兩說未知孰是  
玉海亦

云庚午以續通鑑是月丁卯朔計之庚午

爲四日與宋史合而續通鑑乃云辛未南

漢主降薛史則明云四月五日爲王師所

擒是又以爲二月五日矣二說亦各異然

劉氏興亡錄云宋開寶四年正月辛未

是年

正月無辛未僞少主迎六軍於城北七里

必二月之誤

潘美宣赦釋罪其云辛未與通鑑合興亡

錄爲胡賓王作當時稱南漢國史出降月  
日自所目擊視他書尤信今採續通鑑并  
悉考諸書補其闕南漢春秋誤作十月陷  
韶州十一月陷連州遍考無云先陷韶州  
者按方輿紀要稱由嶺南下可以直走韶  
州然由連指韶實奪錢曉此亦連先於韶  
之証

州六十

歐史職方考序云嶺南北四十七州爲南  
漢今據續通鑑

斬宦者五百餘人

續通鑑有閹工百餘輩盛服請見美曰是  
極人多矣我奉詔伐罪正爲此等命悉斬  
之今從宋史張傳

行至公安

宋史張傳作至江陵按宋史地理志江陵

公安並隸荆湖北路之江陵府  
張傳所稱類渾舉府名今從續通鑑

至京太祖命呂餘慶劾問約降復戰及焚府庫之罪後主歸罪澄樞復使問澄樞等

宋史李托傳及就擒至許田太宗遣使問托等昨已約降復率眾戰及縱火焚府庫爲誰之謀是中道迎問托等也續通鑑則云先問張張委罪澄樞等三人復遣問三

人皆俛首不對是先問鋹再問澄樞似於情事較信且皆至京舍玉津園後事與宋史鋹傳合今從之鋹傳無繼問澄樞等事五月乙未朔繫後主獻太廟

玉海作五月一日己未宋史作乙未按是年正月戊戌朔至五月朔則乙未矣今從宋史

斬澄樞三人於千秋門外

十國春秋注云一作午門外今從宋史  
六年三月薨年三十九

宋史云太平興國五年薨而不詳何月續  
通鑑綱目則繫於是年三月今按張以周  
顯德五年襲位年十六卒年三十九首尾  
凡二十四年卒年當爲太平興國六年綱  
目乃誤先一年耳今更正其年而姑仍其

月



異

自言玉皇附其身

宋史樊胡入宮言玉皇命張爲太子皇帝  
坐宣禍福張再拜聽命按五國故事樊胡  
子自言玉皇大帝附其身爲大帝言曰瓊  
仙等皆我命之以爲爾輔張再拜而聽蓋  
張以爲眞玉皇降故拜非拜巫也今從故  
事

有爲內三師三公者

十國春秋百官表有內太師內太傅內太保按南漢內太師之職最多無官內傅保者邵氏見聞後錄云漢唐宦者可謂盛矣然官不至師保也劉鋹有宦者七千餘人始有爲師保者藝祖旣縛鋹以來鑒其禍內侍不許過供奉官又鋹之宮輒名龍德云云據此則當日自有保傅之職特無考耳又南海志作宦者近二萬人今從宋史

建天華宮欲鑿渠通羅浮不果

增城志張建天華宮鑿涌於增城惠州博  
羅兩志並云建天華宮於羅浮山至宋朝  
革命僭叛以次誅服劉氏懼欲潛遁羅浮  
爲狡兔之穴命於增江口鑿濠通山倉卒  
爲航舟計知劉氏爲宮室於山間無事爲  
臨賞之樂警急爲遁逃之所

志語本東坡文集按

歐史宋史續通鑑並云以舶十餘欲入海

重載珍寶爲樂範所盜則當日已備舟海  
濱矣如云欲避居羅浮今渠尙未鑿安有  
大舶爲範竊走事惠州博羅增城志並誤  
又歐必元羅浮行記云晟作天華宮今從  
十國春秋  
採珠者二千人

澠水燕談錄兵置八千人專以採珠爲事  
今從續通鑑

異

城內行鉛錢

十國紀年漢史劉龔以國用不足鑄鉛錢  
十當銅錢一乾和後多聚銅錢城內用鉛  
城外用銅十國春秋繫於大寶五年今統  
附紀後

野蕈生宮殿狐鳴鬼哭

歐史在大寶四年云芝菌生於宮中無狐  
鳴鬼哭事五國故事作銀末年事云野蕈

生宮殿無歐史所載野獸觸寢門苑中羊吐珠事按芝菌野蕈同物異名或各爲一事別無考證今姑分隸而刪其複

### 丁與水同宮

十國春秋己與水同宮陳璉惠州羅浮山志作丁黃通志云太祖丁亥年生長太宗十二歲平嶺南乃太祖之世故知者以此論之又引宋人題陳搏象有屬豬人已著

龍袍語爲丁亥聖君出之證今從之又按掘劍在欽州之羅浮見欽州志惠州志編入郡事誤陳璉則誤以爲惠州羅浮而收之也

以珍珠結鞍勒爲戲龍之狀

五國故事作珍珠龍鳳鞍帕今從宋史

詔示尙方諸工官

宋史作示諸宮官

謂左右曰至豈至滅亡哉

五國故事謂羣臣曰聞銀所貢悉皆手製其所善止此不亡何待耶今從宋史

歸葬韶州城北六里之王山

十國春秋歸葬於韶州之越王山寰宇記王山俗名越王山二千石初到皆致虔祠廣東輿圖越王山俗呼白虎山南越王劉銀之墓在焉是越王山本名王山因銀封



南越王歸葬後故名之越王山耳又輿地紀勝銀墓在曲江縣獅子岡黃通志云獅子岡卽今白虎寺越王山也但無影跡可考又按增輯嶺海名勝記引鄭學醇花田詩注云南漢主劉鋹歸宋爲恩赦侯放歸後學煉丹自古降王得反國惟鋹一人今考學醇勾漏集註止云僞劉歸宋爲恩赦侯學燒丹不云放歸也名勝記誤

異

南漢書考異卷六終

南漢書卷七

順德梁廷枏章冉撰

列傳第一

廷枏曰古一姓之興固其祖若宗數世所積累  
抑內助之賢母範之正有以成之南漢據偏隅  
渺乎莫可比數然考所自起實藉外家援引之  
力韋后之歸代祖也排羣議僅而後濟天所以  
啟劉氏者不可謂不厚奈何妬遇妾媵戕段氏

而奪所生於襁褓中蓋閨房之內不能正厥始  
焉馬后正位十又七年琴絃中絕於是趙太妃  
謝尚儀輩爭妍獻媚寵冠一時乃殤帝甫立而  
賊臣弑之循王請討賊而怨家殺之覆巢取鵲  
哀鳴無及曾不若蘓才人之淡謝榮華猶足道  
遙自適也吁可悲已中宗嬪御之列雜之以周  
親雖事出蠻夷難論倫紀而彥真奸通之獄卒  
發於身後而莫能掩蔽冥冥中有主之者矣瓊

仙瓊芝自中宗時久干外政至後主而大恣狐  
威黨朋閹豎因之李氏二女魚貫而前媚豬妖  
邪日陪遊輦以禁廷爲宣淫之地以宮婢爲倡  
妓之流汚玷如斯不亡何待卽有艷述於文人  
學士如素馨如離非女子者宛矣掩宮闈穢跡  
於萬一哉詩有之言之醜也作后妃傳

后妃列傳

武皇后韋氏京兆萬年人唐左僕射宙從女也

先世多顯宦有孝寬者仕隋至尙書令琨仕唐  
爲太子詹事贈泰州都督諡貞祖丹舉五經高  
第積官晉慈隰州觀察使封武陽郡公咸通三  
年分嶺南爲西東道以宙爲東道節度使挈家  
至南海后亦隨侍時南詔陷交趾嶺表震動宙  
撫兵積備選練部曲代祖適隸麾下充賀水鎮  
將職級甚卑而氣宇特超異宙見招與語奇之  
將使后歸焉宙夫人以貴賤懸殊慮招物議頗

猶豫然宙意殊決夫人恐不可諫乃諷諸幕僚  
從容勸止其事宙弟岫因曰彼狀貌迥出庸流  
吾就結婚媾他日子孫或可依托由是卒以后  
妻代祖生烈宗未幾其妾段氏產高祖於外舍  
后素妬不能逮下聞段亦產子怒不可制拔劍  
出中門使取高祖至將手刃之及見卽驚悸所  
持劍不覺墜地良久曰此非常兒我家之寶也  
遂取高祖自養爲子先封越國夫人高祖稱制

追尊曰武皇后

段氏代祖側室高祖生母也唐僖宗文德元年  
生高祖時武皇后韋氏已產烈宗聞之不能容  
欲殺高祖使索之段氏懼莫敢匿后既養高祖  
爲己子慮他日有違言後三日遂殺段氏滅其  
跡段氏被害代祖爲營葬地土中得白石版有  
篆文曰隱台巖因名烈宗曰隱高祖曰巖高祖  
長嗣烈宗位無敢言段氏被殺事者故稱尊後



不及追上稱號焉

高祖皇后馬氏楚武穆王殷女也乾化初高祖代烈宗爲節度有吞併隣封志數攻楚梁帝遣使來叶和兵始息三年高祖年二十八將擇偶以楚新睦欲結爲婚姻遂使如楚求后武穆王許之因聘焉貞明改元八月具禮往迎武穆王使弟永順節度使存送后來嶺南禮意優厚后既歸高祖越二年高祖始稱越帝封后越國夫人

人乾亨三年春冊爲皇后大有七年冬殂祔葬於康陵

太妃趙氏殤帝生母也有殊色事高祖寵擅專房大有中封昭儀光天元年殤帝嗣位尊爲皇太妃

尙儀謝氏名宜清姿容絕艷選入事高祖愛之進職尙儀馬后殂命偕尙衣高氏至吳越求后妹吳越不遣遂還

才人蘇氏咸寧人有色工詩律好爲歌詞後宮  
擬之曹大家大有初封才人時高祖多內嬖爭  
妍獻媚惟恐不得當蘇氏亦被寵幸然性雅淡  
絕無希寵意官中日焚香靜坐或寫字數紙而  
已

麗妃李氏中宗妃也性狡媚最見寵幸中宗方  
委任宦官宦官又潛結宮掖以爲援內侍監許  
彥真知妃寵固頃心向之因得表裏用事大寶

中彥真與龔澄樞爭權會有人告妃通彥真澄樞將按其事兩班將軍王仁遇素附澄樞亦以彥真謀叛入告彥真誅妃事乃寢

貴妃李氏後主妃內官李託所養長女也後主廣選後宮嬪御託養二女皆有色大寶五年並進之既得幸大被寵憐卽日冊爲貴妃

美人李氏託所養次女也與其養姊同時進御亦得寵後主旣冊其姊爲貴妃李氏亦得封美

人宮中以漢之飛燕合德擬之

盧瓊仙咸寧人中宗時宮人體輕盈肌膚雪白  
乾和中與黃瓊芝等十餘人並爲女侍中朝服  
冠帶出參朝政後主嗣位進拜才人女巫樊胡  
子爲玉皇言謂後主瓊仙等皆我遣輔爾不得  
治其過後主信之無大小悉決焉每詳覽章奏  
以瓊仙言爲可否不復有所增減瓊仙遂結內  
官龔澄樞陳延壽輩專握朝柄廷臣但備員聽

中旨卒以此亡國

波斯女不知其姓後主宮人貌黑脂而光艷性  
絕慧巧得人意每見幸能曲盡淫態後主甚嬖  
之賜名媚豬嘗挈之遊幸離宮數十所環厯殆  
遍所至必一月或旬日乃還宮後主本荒縱得  
女益淫褻無度多求方士媚藥以助之又好觀  
人交選惡少年數輩入宮使與宮婢就後苑褫  
衣露偶扶女往來循觀爲笑樂號大體雙時與

女戲狎宮妾滿前不令避鳥獸習見之亦能效其狀國亡後不知所終

素馨後主司花宮女以色進御封美人性喜簪那悉茗花因名之素馨死葬興王府城西北郊後主痛之使人多植那悉茗花於塚上號其地曰素馨田墳曰素馨斜

離非女子後主時宮人性慧通筆札能作大小篆爲後主所眷始終不少弛內宮文房寶玩多

歸典掌得一硯石形甚小而佳嘗製銘鐫刻自  
寶藏之

李蟾妃不知何時入宮有殊寵時與王府城  
外蘓氏園景絕幽勝妃嘗隨上微行至此憇蕉  
林中酒酣大書蕉葉曰扇子僊好事者搆扇子  
亭其上以紀勝云

南漢書卷七終



南漢書考異卷七

順德梁廷枏章冉撰

武皇后傳

有孝寬者仕隋至尙書令

新唐書韋丹傳周大司空孝寬六世孫宰  
相世系表文惠公旭次子叔裕字孝寬隋  
尙書令官爵互異今從世系表

咸通三年以宙爲東道節度使

舊唐書懿宗紀咸通三年分嶺南爲東西  
道以邕管經畧使鄭愚爲廣州刺史充嶺  
南東道節度觀察處置等使唐書語林韋  
宙大中初除廣州節度據此似宙在大中  
間已節度廣州至咸通三年分道時任東  
道者爲鄭愚非宙也又通鑑分嶺南爲兩  
道以嶺南節度使韋宙爲東道節度使據  
此則宙于咸通三年已改東道矣兩說互

異今按新唐書宣懿兩宗紀無命宙爲節度明文而宙傳遷嶺南節度使在南詔陷交趾時南蠻傳南詔攻交州進畧安南在咸通三年其年宙奏南詔必襲邕管且是年西道節度蔡京爲亂軍所逐以鄭愚代京爲節度則宙官東道節度在咸通三年與通鑑合舊書乃誤以鄭愚所領之西道爲東道耳今從新書及通鑑

異  
諷慕僚令勸止其事宙弟岫因曰此人狀貌迥  
出庸流吾子孫或可依託

薛史宙以猶女妻之妻以非其類堅止之  
宙曰此人非常流他日我子孫或可依之  
北夢瑣言乃以從猶女妻之其內以非我  
族類慮招物議諷諸幕僚請諫止之丞相  
曰此人非常流也他日吾子孫或可依之  
新唐書韋岫傳宙在嶺南以從女妻小校

劉謙或諫止之岫曰吾子孫或當依之薛  
史無諷幕僚諫止事新書作岫語互異按  
岫傳云盧攜舉進士陋甚岫獨謂攜必大  
用攜果執政據此則岫素有人倫之鑒妻  
謙一事或起意在宙至是岫復以一言贊  
成之也今從新書又舊唐書譔傳以兄女  
妻之衆謂不可當指幕僚諫止事

段氏傳

異

段氏高祖生母

北夢瑣言謙以軍功拜封州刺史韋夫人  
生子曰隱曰巖隱爲廣帥巖嗣之薛史謙  
之長子曰隱卽韋氏所生歐史殺段氏養  
爲己子五國故事巖之正母韋氏頗妬按  
諸書無云巖爲韋氏所生者瑣言誤

後三日遂殺段氏

五國故事止云取爲己子無殺段氏事今

據歐史

有篆文曰隱台巖因名烈宗曰隱高祖曰巖

新唐書韋岫傳謙後以功爲封州刺史生  
二子卽隱龔按劉氏興亡錄皇考葬段氏  
得石版有篆文曰隱台巖因名其三子新  
書云二子誤

高皇后馬氏傳

祔葬於康陵

馬氏葬地諸書無考曝書亭集南漢主劉  
龔墓在番禺縣治東二十里北亭明崇正  
丙子秋九月穴中有鷄鳴土人發其墓隧  
道崇五尺深三尺有金像十二一冕而坐  
一笄而坐殆馬后也又精華錄訓纂墓在  
縣東二十里崇正九年秋北亭洲間有雷  
出奮而成穴一田父見之投以石空空有  
聲乃內一雄鷄其中夜盡聞鷄鳴率子弟



以入堂宇豁然珠簾半垂左右金案玉几  
備列有金人十二中二金像冕而坐若王  
與后者重各五六十斤按馬氏像與巖並  
置墓中疑馬氏祔葬康陵矣且馬氏死在  
巖稱帝後卽別置陵寢其封樹華表自有  
體制後人固易尋識然見於紀載者康陵  
而外晟墓在番禺縣東北四十里之昭陵  
山鋹墓在曲江縣北獅子岡劉王女墓在

陽江縣東劉王墓在開平縣東白桂坪謙  
與隱墓並在封川縣北十里劉王岡

俱見

大清一  
統志

宮人葬番禺縣西十里三角市而

已馬氏墓固未之間又南海百詠序云陵  
山劉氏墓在郡東北二十里漫山皆荔子  
樹龜跌石獸具存昔有發其墓者其中以  
鐵鑄之予嘗至此摩挲斷碑不見始末但  
見其詞皆葬婦人墓考之偽史疑懿陵也

他尙有數處如南海宜風鄉以番禺黃坡  
新會上臺玉環了髻山等處皆有之云云  
與十國春秋高祖陵中以鐵錮之在城東  
二十里皆合當是康陵其云葬婦人墓或  
卽敘馬氏祔葬事碑殘不得其始末耳今  
直書祔葬康陵而誌疑於此又按南漢五  
主惟玠陵名無考百咏序稱考之僞史疑  
是懿陵不知何指且所據何書也

尙儀謝氏傳

進職尙儀

九國志洪杲傳母南儀謝氏今從吳越備

史

麗妃李氏傳

十國春秋作麗姬今從續通鑑

盧瓊仙傳

十國春秋附后妃列傳末按瓊仙銀時已

拜才人應次李氏二女傳後

素馨傳

死葬興王府城西

大清一統志五代南漢劉王女墓明統志在陽

江縣東王女名素馨葬此塚上生那悉茗

花因名素馨南海百咏序花田在城西十

里三角市平田彌望皆種素馨花南征錄

云劉氏美人葬於此嶺海名勝記南漢葬

宮人於此有美人喜簪素馨遂種之塚上  
名曰素馨斜按一統志所載在今肇慶府  
陽江縣事同地異且一云王女墓一云宮  
人墓人固不同也

### 李蟾妃傳

南漢春秋事後主得殊寵按十國春秋不  
載何時人阮通志古蹟畧亦止云事漢主  
不云何主也今附后妃傳後蟾妃南漢春

秋作姬

異

南漢書考異卷七終